

# Orang Yang Beruntung

Oleh : Nasif Sidquee Pauzi  
(Koordinator ACIS UiTM Kampus Seremban)

عَنْ عَبْدِ اللَّهِ بْنِ عَمْرٍو أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ قَالَ قَدْ أَفْلَحَ  
مَنْ أَسْلَمَ وَكَانَ رِزْقُهُ كِفَافًا وَقَنَعَهُ اللَّهُ قَالَ هَذَا حَدِيثٌ حَسَنٌ صَحِيحٌ

Daripada Abdullah bin Amru, bahawa Rasulullah SAW bersabda: “Beruntunglah sesiapa yang telah Islam, hartanya mencukupi dan Allah menjadikannya qanaah.”  
Hadith hasan sahih.

Di dalam hadith ini, Rasulullah SAW telah memberi khabar gembira kepada individu yang berserah diri sepenuhnya kepada Allah SWT. Seorang muslim yang beruntung menurut Nabi SAW, bukanlah seorang yang kaya-raya dengan harta yang melimpah ruah, tetapi rezeki yang ada padanya adalah “kafafan” iaitu mencukupi. Perkataan “kafafan” atau mencukupi itu memberi maksud bahawa dalam kehidupan ini, apabila rezeki yang kita miliki sudah cukup, maka haruslah kita memanjatkan kesyukuran kepada Allah Taala di atas kecukupan itu.

Ada manusia yang hartanya banyak, tetapi tidak mencukupi. Hutangnya tidak pernah berkurang, malah semakin hari semakin bertambah. Walaupun pendapatan bulannya mencecah 5 angka, tetapi jiwanya sentiasa risau, tidak cukup rasanya harta yang diperolehi. Setiap masa sibuk memikirkan hal keduniaan supaya bertambah lagi kekayaannya. Orang yang sebegini

jika menurut hadith di atas, bukanlah seorang yang beruntung kerana harta yang banyak tidak membuat dirinya merasa cukup.



Berbeza pula dengan individu yang Allah rezekikan kepadanya dengan rezeki yang cukup. Walaupun gajinya tidaklah sebesar mana, namun hidupnya bebas dari belunggu hutang, anak isterinya cukup makan dan pakai. Masanya sentiasa terluang untuk ibadah dan perkara bermanfaat. Maka orang yang sebegini sangat beruntung hidupnya kerana Allah memberikan rezeki


yang cukup buatnya. Justeru, sebagai seorang muslim, sewajarnya untuk kita berdoa memohon kepada Allah agar rezeki yang dikurniakan kepada kita mencukupi buat kita dan keluarga kita. Sentiasalah kita berdoa memohon agar Allah Taala memberkati dan merahmati rezeki yang dikurniakan kepada kita.

Hadith ini bukanlah bermaksud untuk menghalang kita daripada mencari kekayaan duniawi. Tetapi ia memberi peringatan kepada kita agar menyeimbangkan antara keperluan duniawi dan ukhrawi kita. Jangan disebabkan terlalu sibuk mencari kekayaan dunia hingga kita terlupa untuk menyediakan bekalan hari akhirat kita nanti. Selain itu, Rasulullah SAW turut menyebut di dalam hadith ini, orang yang beruntung adalah orang yang bersifat qanaah.



Kamus Dewan mendefinisikan qanaah sebagai sikap berpada-pada, iaitu berpuas hati dengan apa yang ada. Sikap ini termasuk dalam kategori akhlak mahmudah menurut Islam. Ia adalah suatu sikap yang perlu ada dalam diri seseorang muslim. Seorang yang qanaah tidak akan merasa iri hati

ataupun tamak apabila melihat orang lain mendapat rezeki yang lebih berbanding dirinya. Dia akan bersyukur dan menggunakan harta yang dianugerahkan kepadanya sebaik mungkin tanpa mempersoal rezeki yang diperolehinya.



Abdul Malik Karim Amrullah atau lebih masyhur dengan gelaran Hamka di dalam karyanya Tasawuf Modern telah menghuraikan maksud qanaah kepada lima elemen iaitu:

1. Menerima dengan rela apa yang ada
2. Memohon kepada Tuhan untuk tambahan yang sesuai dan berusaha

3. Menerima dengan sabar ketentuan Tuhan
4. Bertawakal kepada Allah
5. Tidak tertarik dengan tipu daya dunia

Lima elemen ini menggambarkan kepada kita bahawa konsep qanaah itu bukanlah bermaksud tidak langsung berusaha untuk urusan duniawi tetapi Hamka menghuraikannya dengan begitu menyeluruh. Ajaran Islam melalui petunjuk Rasulullah SAW memberi panduan kepada setiap muslim agar reda dengan ketentuan Allah, walau bagaimanapun dalam masa yang sama seseorang muslim perlu memohon agar Allah SWT menambah rezekinya yang sesuai dengan kadar usahanya. Setelah berusaha, maka sepenuh pengharapan diberikan kepada Allah Taala dengan bertawakal. Hamka turut menyatakan bahawa qanaah itu juga bermaksud seseorang muslim itu tidak tertarik dan tertipu dengan duniawi.

Artikel ini ditulis dalam suasana seluruh dunia sedang menghadapi pandemik COVID-19. Malaysia juga amat terkesan dengan pandemik ini. Seluruh rakyat telah diminta untuk mematuhi Perintah Kawalan Pergerakan (PKP). Kesan pandemik amat dahsyat kepada masyarakat dunia. Di Malaysia kita dapat melihat situasi panik berlaku di mana

rakyat berpusu-pusu membuat pembelian panik. Akibat daripada itu, ada barangan di pasaran yang terjejas.

Seharusnya masyarakat Malaysia secara umumnya, dan masyarakat muslim khususnya menghayati konsep qanaah dalam menghadapi situasi genting ini. Berpadalah semasa membeli barangan keperluan. Tidak perlu tamak semasa di kedai atau pasar seperti hilang kewarasan akal. Sewajarnya ujian pandemik ini menjadikan kita kembali menjadi manusia berakal dan berperanan sebagai khalifah yang berfungsi memakmurkan dunia ini. Semoga rakyat Malaysia tabah menghadapi segala cabaran yang bakal ditempuhi. Allahul Musta'an.

#### Rujukan

Abu Isa Muhammad bin Isa al-Tirmizi, Sunan al-Tirmizi, No hadith: 2271, h. 348, (Maktabah Shamilah)

Kamus Dewan Edisi Keempat: <http://prpm.dbp.gov.my/Cari1?keyword=qanaah>

Muhammad Husni Mubarak. (2018). Qana'ah Sebagai Cara Mencegah Perilaku Hedonis (Perspektif Hamka) (Disertasi). Universitas Islam Negeri Walisongo, Semarang, Indonesia

